

Z121

1

20880

翰

00334

苑

羣

書

洪
遵
輯

中
華
書
局

叢書集成初編

翰苑羣書

中華書局出版發行

(北京王府井大街三十六號)

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之一

統一書號：ISBN7-101-00894-1/K·367

序

官有所由重。朝廷之重是官。必先思其可重者何在。斯其遴選也。不得不慎。而其禮遇也。不得不崇。居是官者。亦必有以自異於曲藝雜流之幸承恩澤者。而官乃重也。詞林之職。古今以爲榮選。其於主眷之隆渥。一言一事。津津傳爲美談。然使在上者。以爲此吾之私人。而故厚焉。在下者。亦惟是以得數望清光。效庶幾歌頌之美爲幸。則其事皆不足道也。君以朝夕啓沃望其臣。臣以隨事納忠効於君。君臣一德。驪然無間。其任不在職事之末。而其所長亦併不在文字之間。是則上之所以重是官。不爲過。而其臣之得此於上。非倖也。是編爲宋洪景嚴氏所彙輯。自唐以來事例。略可考見。誠有足動人豔羨者。然不探其本而言之。徒以遭遇好文章稽典故之主。侍從雍容之外。別無裨補。其與曲藝雜流之幸承恩澤者何異。是官本重。而其所以可重者。曾未之思也。將何以取重於其君。而使庶司百職事羣羨以爲清華之選乎。先余未有是書。因借本錄竟。手自校對。漫識數語於其端。

乾隆三十九年五月初日。東里盧文弨書於鍾山書院之須友堂。

跋

翰苑秩清地禁。沿唐迄今。爲薦紳榮。遵世蒙國恩。父子兄弟。接武而進。實爲千載幸遇。曩嘗粹遺事一編。竭來建鄴。以家舊藏李肇、元稹、韋處厚、韋執誼、楊鉅、丁居晦、洎我宋數公。凡有紀於此者。併棄之木。仍以國朝年表中與題名附。乾道九年二月七日。番陽洪遵書於清瀟閣。

目錄

翰林志

承旨學士院記

翰林學士記

翰林院故事

翰林學士院舊規

重修承旨學士壁記

禁林讌會集

續翰林志

次續翰林志

學士年表

翰苑題名

翰苑遺事

翰苑羣書

翰林志

唐李肇撰

昔宋昌有言曰。所言公。公言之。所言私。王者無私。夫翰林爲樞機宥密之地。有所慎者。事之微也。若制置任用。則非王者之私。漢制。尚書郎主作文書起草。更直於建禮門內臺。給青縑白綾。或以錦被帷帳氍毹。畫通中枕。太官供食。湯官供餅餌。五熟果。五日一美食。下天子一等。建禮門內得神仙門。神仙門內得光明殿。神仙殿有門下省中書省。蓋比今翰林之制略同。而所掌輕也。漢武帝時。嚴助、朱買臣、吾丘壽王、司馬相如、東方朔、枚舉之徒。皆在左右。是時朝廷多事。中外論難。大臣數詘。亦其事也。唐興。太宗始於秦王府開文學館。擢房元齡、杜如晦一十八人。皆以本官兼學士。給五品珍膳。分爲三番更直。宿於閣下。討論墳典。時人謂之登瀛洲。貞觀初。置宏文館學士。聽朝之隙。引入大內殿。講論文義。商較時政。或夜分而罷。至元宗置麗正殿學士。名儒大臣皆在其中。後改爲集賢殿。亦草書詔。至翰林置學士。集賢書詔乃罷。初。國朝脩陳故事。有中書舍人六員。專掌詔誥。雖曰禁省。猶非密切。故溫大雅、魏徵、李百藥、岑文本、褚遂良、許敬宗、上官儀。時召草制。未有名號。乾封已後。始曰北門學士。劉懿之、劉祿之、周思茂、元萬頃、范履冰爲之。則天朝。蘇味道、韋承慶。其後上官昭容獨掌其事。睿宗則蘇稷、賈膺福、崔湜。元宗初。改爲翰林待詔。張

說陸堅、張九齡、徐安貞相繼爲之，改爲翰林供奉。開元二十六年，劉光謙、張垠乃爲學士，始別建學士院於翰林院之南。又有韓紘、閻伯興、孟匡朝、陳兼、李白、蔣鎮在舊翰林院，雖有其名，不職其事。至德宗已後，翰林始兼學士之名。代宗初，李泌爲學士，而今壁記不列名氏，蓋以不職事之故也。

按六典，中書掌詔旨、制敕、爾書、冊命，皆案典故，起草進書，其禁有四：一曰漏洩，二曰稽緩，三曰遺失，四曰忘誤。所以重王命也。制敕既行，有誤則奏而正之。凡王言之制有七：一曰冊書，立后建嫡，封樹藩屏，寵命尊賢，臨軒備禮，則用之。二曰制書，行大典賞罰，授大官爵，釐革舊政，赦宥降虜，則用之。三曰慰勞制書，褒贊賢能，勸勉遺勞，則用之。四曰發白敕，增減官員，廢置州縣，徵兵發馬，除免官爵，授六品已下官，處流已上罪，竝用之。五曰敕旨，爲百司承旨而爲程式，奏事請施行者，則用之。六曰論事敕書，慰諭公卿，誠約臣下，則用之。七曰敕牒，隨事承旨，不易舊典，則用之。又答疏於王公，則用皇帝行寶，勞來勳賢，則用皇帝之寶，徵召臣下，則用皇帝信寶，答四夷書，則用天子行寶，撫慰蠻夷，則用天子之寶，發蕃國兵，則用天子信寶，並甲令之定制也。近朝大事，直出中禁，不由兩省，不用六寶，竝從權也。元和初，置書詔印，學士院主之。凡敕書德音，立后建儲，大誅討，免三公宰相，命將曰制，並用白麻紙，不用印。雙日起草，候閣門鑰入而後進書。雙日百寮立班於宣政殿，樞密使引案，自東上閣門出，若謫宰相，則付通事舍人，矩步而宣之，機務要速，亦用雙日。甚者雖休暇追朝而出之。凡賜與徵召，宣索處分曰詔，用白藤紙。凡慰軍旅，用黃麻紙，並印。凡批答表疏，不用印。凡太清宮道觀薦告詞文，用青藤紙朱字，謂之青詞。凡諸陵薦告上表，內道觀歎

道文並用白麻紙。雜詞、祭文、禁軍號並進本。

凡將相告身用金花五色綾紙。所司印。凡吐蕃贊普書及別錄用金花五色綾紙。上白檀香木真珠瑟瑟鈿函。銀鏤回紇可汗新羅渤海王書及別錄並用金花五色綾紙。次白檀香木瑟瑟鈿函。銀鏤諸蕃軍長吐蕃宰相回紇內外宰相摩尼已下書及別錄並用五色麻紙。紫檀木鈿函。銀鏤並不用印。南詔及大將軍清平官書用黃麻紙。出付中書奉行。卻送院封函。與回紇同。凡畫而不行者藏之。函而不用者納之。

凡參議奏論撰述注釋無定名。奏復無晝夜。凡徵天下草澤之士。臨軒策試。則議科設問。覆定與奪。凡受宣有堂歷自記。有承旨簿記。大抵四者之禁無殊。而漏洩之禁爲急。天寶十二載。安祿山來朝。元宗欲加同中書門下平章事。命張垆草制不行。及其去也。怏怏滋甚。楊國忠曰。此垆告之也。遂貶盧溪郡司馬。兄均建安郡太守。弟叔宜春郡司馬。

德宗雅尚文學。注意是選。乘輿每幸學士院。顧問錫賚無所不至。御饌珍肴輟而賜之。又嘗召對於浴堂。移院於金鑾殿。對御起草。詩賦唱和。或旬日不出。吳通微昆季同時擢用。與陸贄爭恩。不叶。甚於水火。天下醜之。貞元三年。贄上疏曰。伏詳令式及國朝典故。凡有詔令。合由於中書。如或墨制施行。所司不須承受。蓋所以示王者無私之義。爲國家不易之規。貞觀中有學士一十八人。太宗聽朝之餘。但與講論墳籍。時務得失。悉不相干。實錄之中。具載其事。元宗末。方置翰林。張垆因緣國親。特承寵遇。當時之議。以爲非宜。然止於唱和文章。批答表疏。其於樞密。輒不預知。肅宗在靈武。鳳翔事多草創。權宜濟急。遂破舊章。翰

林之中始掌書詔因循未革以至於今歲月滋深漸逾職分頃者物議尤所不平皆云學士是天子私人侵敗綱紀致使聖代虧至公之體宰臣有備位之名陛下若俯順人情大革前弊凡在詔敕悉歸中書遠近聞之必稱至當若未能變改且欲因循則學士年月校深稍稍替換一者謗議不積二者氣力不衰君臣之間庶全終始事關國體不合不言疏奏不納雖微據錯謬然識者以爲知言貞元末其任益重時人謂之內相而上多疑忌動必拘防有守官十三考而不遷故當時言內職者多滯滯相半及順宗不豫儲位未立王叔文起於非類竊學士之名內連牛美人李忠言外結姦黨取兵柄弄神器天下震駭是時鄭綱爲內庭之老首定大計今上卽位授綱中書侍郎平章事

初姜公輔行在命相乃就第而拜之至李吉甫除中書侍郎平章事適與裴垠同直垠草吉甫制吉甫草武元衡制垂簾揮翰兩不相知至暮吉甫有歎惋之聲垠終不言書麻尾之後乃相慶賀禮絕之敬生於座中及明院中使學士送至銀臺門而相府官吏候於門外禁署之盛未之有也

凡學士無定員皆以他官充下自校書郎上及諸曹尚書皆爲之所入與班行絕跡不拘本司不繫朝謁常參官二周爲滿歲則遷知制誥一周歲爲遷官則奏就本司判記上月日北省官宰相送南省官給舍丞郎送上

興元元年敕翰林學士朝服序班宜準諸司官知制誥例凡初遷者中書門下召令右銀臺門候旨其日入院試制書答共三首詩一首自張仲素後加賦一首試畢封進可者翌日受宣乃定事下中書門下於

麟德殿候對。本院賜宴。營幕使宿設帳幕圖褥。尚食供饌。酒坊使供美酒。是爲敕設。序立拜恩訖。候就寢。又賜衣一副。絹三十匹。飛龍司借馬一匹。旬日又進文一軸。內庫給青綺錦被。青綺方搭。青綾單帕。漆通中枕。銅鏡。漆奩。象篋。大小象梳。漆箱。銅擘羅。銅觥碗。紫絲履。白布手巾。畫木架牀。鍍銅案。席氍毹之類。畢備。內諸司供膳飲之物。主膳四人掌之。內園官一戶三人。以供使令。其所乘馬。送迎於辟仗門內橫門之西。度支月給力手資四人。人錢三千五百。四品已上加一人。每歲內賜春服物三十匹。暑服三十匹。縣七屯。寒食節。料物三十匹。酒餚。杏酪粥。胾肉。啖。清明。火二社。蒸饌。端午。衣一副。金花銀器一事。百索一軸。青圍。鑲竹大扇一柄。角糴三服。粉蜜。重陽。酒。餠。粉糕。冬至。歲酒。兔。野雞。其餘時果。新茗。瓜。新歷。是爲經制。直日就頒授。下直就第賜之。凡內宴。坐次宰相坐居一品班之上。別賜酒食珍果。與宰相同。賜帛二十四。金花銀器一事。貞元四年。敕晦日。上巳。重陽。三節。百寮宴樂。翰林學士每節賜錢一百千。其日奏選勝而會。賜酒脯茶果。明年。廢晦日。置中和節。宴樂如之。非凶年旱歲兵革。則每歲爲常。凡正冬至不受朝。俱入進名奉賀。大忌進名奉慰。其日尚食供素饌。賜茶十串。凡郊廟大禮。乘輿行幸。皆設幕次於御幄之側。侍從親近人臣第一。御含元殿丹鳳樓。則二人於宮中乘馬。引駕出殿門。徐出就班。大慶賀則俱出就班。凡當直之次。自給舍丞郎入者。三直無僦。自起居御史郎官入。五直一僦。其餘雜入者。十直三僦。新遷官一直。服價名於次之中減半。著爲別條例。題於北壁之西閣。

凡交直候內朝之退。不過辰巳。入者先之。出者後之。直者疎數。視人之衆寡。事之勞逸。隨時之動靜。凡節國忌。授衣。二分田假之令。不霑。有不時而集。併夜而宿者。或內務不至。外喧已寂。可以探窮理性。養浩然之氣。故前輩傳楞伽經一本。兩在屋壁。每下直。出門相諷。謂之小三昧。出銀臺乘馬。謂之大三昧。如釋氏之去纏縛而自在也。北廳前塔有花埽道。冬中日及五埽。爲入直之候。李程性懶。好晚入。恆過八埽。乃至衆呼爲八埽學士。

元和已後。院長一人。別敕承旨。或密受顧問。獨召對。歇居北壁之東閣。號爲承旨閣子。其屋棟別列名焉。故事。駕在大內。卽於明福門置院。駕在興慶宮。則於金明門內置院。今在右銀臺門之北第一門向口。勝曰翰林之門。其制高大重複。號爲胡門。入門直西爲學士院。卽開元十六年所直也。引鈴於外。惟宣事入。其北門爲翰林院。又北爲少陽院。東屋三院。西廂之結麟樓。南西並禁軍署。有高品使二人知院事。每日晚執事於思政殿。退而傳旨。小使衣綠黃青者逮至。十人更番守曹。南廳五間。本學士駙馬都尉張洎飾爲公主堂。今東西間前架高品使居之。中架爲藏書。南庫西三間。前架中三洞。各設榻。受制旨印書詔。二時會食之所。四壁列制敕條例名數。其中使置博局一印櫃。中開爲北一戶架。東西各二間。學士居。壁之出北門橫屋六間。當北廳通廊。東西二間爲藏書北庫。其二庫書各有錄。約八千卷。小使主之。西三間書官居之。號曰待制。北廳五間。東一開是承旨閣子。並學士雜處之。題記名氏存於壁者。自呂向始。建中已後。年月遷換。乃爲周悉。南北二廳。皆有懸鈴。以示呼召。前庭之南。橫屋七間。小使居之。分主案牘詔草紙。

筆之類。又西南爲高品使之馬廐。北爲寶庫之北小板廊。抵於北廳。廳西舍之南。其一門待詔戴小平。處其中。死而復生。因敝爲南向之宇。畫山水樹石。號爲畫堂。次二間。貯遠歲詔草及制舉詞策。又北迴而東。並待詔居之。又東盡於東垣。爲典主堂。待詔之職。執筆視以俟書寫。多至五六員。其選以能不以地。故未嘗用士人。自王伾得志。優給頗厚。率三歲一轉官。有至四品登朝者。虛廊曲壁。多畫怪石松鶴。北廳之西南小樓。王涯率人爲之。院內古槐松玉葉藥樹。柿子木菰菴羅。山桃李杏櫻桃紫蓋。薇辛夷蒲萄冬青玫瑰。凌霄牡丹山丹芍藥石竹紫花蕪菁青菊。當陸莢葵萱草紫苑署學士至者。雜殖其間。殆至繁陰。元和十二年。肇自監察御史入。明年四月。改左補闕。依舊職守。中書舍人張仲素。祠部郎中知制誥段文昌。司勳員外郎杜元穎。司門員外郎沈傳師。在焉。是時睿聖文武皇帝。裂海岱十二州爲三道之歲。時以居翰苑。皆謂陵玉清。迺紫霄。豈止於登瀛洲哉。亦曰登玉署玉堂焉。

承旨學士院記

中大夫行中書舍人翰林學士承旨上柱國賜紫金魚袋元稹

舊制學士無得以承旨爲名者。應對顧問。參會旅次班第。以官爲上下。憲宗章武孝皇帝以永貞元年卽大位。始命鄭公綱爲承旨學士。位在諸學士上。居在東第一閣。乘輿奉郊廟。輒得乘廐馬。自浴殿由內朝以從。揭雞竿布大澤。則升丹鳳之西南隅。外賓客進見於麟德。則止直禁中以俟。大凡大誥令大廢置。丞相之密畫。內外之密奏。上之所甚注意者。莫不專受專對。他人無得而參。非自異也。法不當言。用是十七

年之間。由鄭至杜十一人。而九參大政。其不至者。衛公詔及門而返。事適然也。

禁省中備傳其事。

至於張。則弄相

印。以俟其病閒者久之。卒不與命也已。若此。則安可以昧陋不肖之積。繼居九丞相二名卿之後乎。俛仰瞻睹。如遭大賓。每自誨其心曰。以若之不俊不明。而又使欲惡欲曲。攻於內。且決事於冥冥之中。無暴揚報効之慮。遂忿行私易也。然而陰潛之神。必有記善惡之餘者。以君父之遇若如是。而猶舉枉錯直。可乎哉。使若之心。忽而爲他人盡數若之所爲。而終不自愧。乃可矣。昔魯恭王餘畫先賢於屋壁。以自警。臨我以十一賢之名氏。豈直自警哉。由是謹其遷授。書於座隅。長慶元年八月十日記。

鄭綱。貞元二十一年二月。自司勳員外郎翰林學士。拜中書舍人。賜紫金魚袋充。其年十月二十七日。拜中書侍郎。同中書門下平章事。集賢殿大學士。

李吉甫。永貞元年十二月二十四日。自考功郎中知制誥入院。二十七日正除。仍賜紫金魚袋充。元和元年。加銀青光祿大夫。二年正月二十一日。拜中書侍郎。同中書門下平章事。

裴垕。元和二年四月十六日。自考功郎中知制誥翰林學士。賜紫金魚袋。拜中書舍人充。三年四月二十五日出院。拜戶部侍郎。其年冬。拜中書侍郎。平章事。

衛次公。元和三年六月二十五日。以兵部侍郎入院充。七月二十三日。加知制誥。四年三月。改太子賓客出院。後拜淮南節度使。

李絳。元和四年四月十七日。自主客員外郎翰林學士。拜司勳員外郎。知制誥充。五月十九日。賜紫金魚

袋。五年五月五日。遷司勳郎中知制誥。十二月正除。六年二月二十七日出院。拜戶部侍郎。其年十月。拜中書侍郎平章事。

崔羣。元和六年二月四日。以庫部郎中知制誥翰林學士。賜緋魚袋充。七年四月二十九日正除。九年六月二十六日出院。拜戶部侍郎。十二月。拜中書侍郎平章事。

王涯。元和十一年正月十八日。以中書舍人入院充。二十四日。賜紫金魚袋。十月十七日。拜工部侍郎知制誥。十二月十九日。拜中書侍郎同中書門下平章事。

令狐楚。元和十二年二月二十四日。以職方郎中知制誥翰林學士。賜緋魚袋充。三月二十日正除。八月四日。出守本官。後自河陽節度。拜中書侍郎平章事。

張仲素。元和十三年二月十八日。以司封郎中知制誥翰林學士。仍賜紫金魚袋。十四年三月二十八日正除。其年卒官。贈禮部侍郎。

段文昌。元和十五年閏正月一日。以中書舍人翰林學士與杜元穎同承旨。仍賜紫金魚袋。八月。拜中書侍郎同中書門下平章事。

杜元穎。元和十五年閏正月一日。以司勳員外郎翰林學士充。賜紫金魚袋。二十一日正除。十一月十七日。拜戶部侍郎知制誥。長慶元年二月十五日。以本官同中書門下平章事。

元稹。長慶元年二月十六日。自祠部郎中知制誥行中書舍人翰林學士。仍賜紫金魚袋。其年十月十九

日拜工部侍郎出院。二年二月拜本官平章事。

李德裕長慶元年正月二十九日以考功郎中知制誥翰林學士賜緋魚袋。二月四日遷中書舍人充餘如故。十九日改御史中丞出院。

李紳長慶二年二月十九日自司勳員外郎知制誥翰林學士賜緋魚袋。遷中書舍人充。二十三日賜紫金魚袋。三年三月二十七日改御史中丞出院。

韋處厚長慶四年二月十三日以侍講學士權知兵部侍郎知制誥。賜紫金魚袋。爲翰林學士。充。十月十四日正拜兵部。餘如故。寶曆元年十二月十七日拜中書侍郎平章事。

翰林學士記

侍讀學士中書舍人韋處厚撰

魏晉以後復典綜機密。政本中書。詔命辭訓皆必由焉。唐有天下。因襲前代。爰自武德時有密命。則溫大雅、魏徵、李百藥、岑文本之屬。視草禁中。乾封則劉懿、周思茂、范履冰之倫。秉筆便坐。自此始號北門學士。皆自外召入。未列祕書。元宗開廣視聽。搜延俊賢。始命張說、陸堅、張九齡、徐安貞輩侍詔翰林。厥後錫以學士之稱。蓋由德成而上。與夫數術曲藝禮有所異也。逮自至德。台輔伊說之命。將壇出車之誥。需洽天壤之澤。導揚顧命之重。議不及中書矣。尺一旁午。章奏藂至。指縱命中之略。謀猷幃幄之祕。陰陽造化。嘉猷密勿。制萌乎將然。事構乎無形。皆歸元后而播興運。循名跡者莫窺其轍。想風彩者罔究其端。誰然誰

否。無得而稱矣。貞元中。由此而居輔弼者。十有二焉。元和中。由此而膺大用者。十有六焉。近日丞相府不由內庭者。斷國論。宰法度。雖有利器長材。未免缺折掉撓。建中以來。簡拔尤重。故必密如孔光。博如延州。文如卿雲。學如欽向。器如黃顏。直如史魚。然得中第士之游心處已。景行於六如者。而又飾之以潔瑋璋之行。貫金石之誠。雖潛聲匿迹。莫能脫。漢時始置尚書郎五人。平天下奏議。分直建禮。含香握蘭。居錦帳。食太官。則今之翰林。名異而實同也。時論以爲登玉清。翔紫霄。豈蓬山瀛洲而足喻乎。齊桓納廢人。編棧之說。以爲直木傳直。則曲無由至。曲木傳曲。則直無由至。後之君子。戴明聖。協盛時。推廢人之規矩乎。引賢使如貫珠駢璧。則瑕瑜不雜矣。內給事李常暉。內謁者將王士玖。並掌院事。近乎十年。與直徇公之議。聆於中書舍人杜元穎。兵部侍郎沈傳師。洎諸學士。皆涉歷歲久。備乎前聞者也。李常暉以北開舊記室。別堵殊義。非貫通。改於前廳。時以爲便。上聖紹復隆典。留神太古。處厚與司勳郎中路隋。職參侍講。通籍近署。紀述之事。前託沈傳師。沈公以爲稱善之在己。不若使其在人。讓於處厚。固陋無以辭。時皇帝統臨四海之初元也。

翰林院故事

起居舍人知制誥韋執誼

翰林院者。在銀臺門內。麟德殿西重廊之後。蓋天下以藝能伎術見召者之所處也。學士院者。開元二十六年之所置。在翰林之南。別戶東向。考視前代。卽無舊名。貞觀中。祕書監虞世南等十八人。或秦府故寮。

或當時才彥皆以宏文館學士會於禁中內參謀猷延引講習出侍輿輦入陪宴私十數年間多至公輔當時號爲十八學士其後永徽中黃門侍郎顧琮復有麗正之稱開元初中書令張說等又有集仙之目皆用討論未有典司元宗以四隩大同萬機委積詔敕文誥悉由中書或慮當劇而不周務速而時滯宜有偏堂列於宮中承導邇言以通密命由是始選朝官有詞藝學識者入居翰林供奉別旨於是中書舍人呂向諫議大夫尹愔首充焉雖有密近之殊然亦未定名制誥書敕猶或分在集賢時中書舍人張九齡中書侍郎徐安貞等迭居其職皆被恩遇至二十六年始以翰林供奉改稱學士由是遂建學士俾專內命太常少卿張垠起居舍人劉光謙等首居之而集賢所掌於是罷息自後給事中張淑中書舍人張漸寶華等相繼而入焉其外有韓翃閻伯璵孟匡朝陳兼蔣鎮李白等在舊翰林中但假其名而無所職至德以後軍國務殷其入直者並以文詞共掌誥敕自此北翰林院始無學士之名其後又置東翰林院於金鑾殿之西隨上所在而遷取其便穩大抵召入者一二人或三四人或五六人出於所命蓋無定數亦有鴻生碩學經術優長訪對質疑主之所禮者頗列其中崇儒也初自德宗建置以來秩序未立廷覲之際各趨本列暨貞元元年九月始有別敕令明預班列與諸司官知制誥同列故事中書以黃白二麻爲綸命重輕之辨近者所出獨得用黃麻其白麻皆在此院自非國之重事拜授將相德音敕宥則不得由於斯稽夫發揮大猷藻繒上命隻簡片削可以動乎人神風行四方萬里始覲非制誥之謂歟蓋人君深拱端默於穆清之中茫茫九區視聽不及雖堯德舜智湯明禹哲不能庭策以朝告不能家閤以戶臻